

ليه نرفض التعديلات الدستورية؟

• لأننا هنتخب رئيس جمهورية بصلاحيات مطلقة، هو رئيس للمجلس الأعلى للقوات المسلحة، ورئيس المجلس الأعلى للقضاء، ورئيس المجلس الأعلى للشرطة، وله حق تعيين الوزراء وعزلهم منفردا، ويقدر يحل مجلسي الشعب والشورى اللي هنتخبهم، ويقدر يصدر القوانين ويعترض على القوانين اللي بيطلعها البرلمان، وبيختار نائب الرئيس اللي هو منصب مهم جدا من غير ما الشعب يبقى له دور في ده، وبيختار بنفسه النائب العام اللي لازم يبقى مستقل علشان يقدر يحاسب أي حد في الدولة، وبيختار رئيس المحكمة الدستورية العليا اللي هو رئيس اللجنة العليا لانتخابات الرئاسة والبرلمان.

• لأننا هنتخب برلمان بصلاحيات محدودة، برلمان ميقدرش يحاسب رئيس الجمهورية، وميقدرش يسحب الثقة من الحكومة إلا بطولع الروح (موافقة أغلبية الثلثين.. يعني مستحيل)، برلمان مشوه بسبب نسبة الـ ٥٠% عمال وفلاحين وكوطة المرأة.

• لأن الثورات لما بتحصل بتلغي الدساتير وتكتب دساتير جديدة، مش بتعدل الدستور القديم، ولأن تغيير الدستور مش تعديله ده كان مطلب رئيسي من مطالب الثورة، والمجلس العسكري قال إنه جاي لتلبية مطالب الثورة، وعليه أنه يلتزم بوعده.

طيب لما نقول نعم إيه اللي ممكن يحصل؟

- هنتخب رئيس بصلاحيات أسطورية ممكن جدا تخليه ينقلب على كل مكتسبات الثورة.
- هنتخب برلمان عاجز عن محاسبة رئيس الجمهورية وحكومته.
- البرلمان هو اللي هيشكل الجمعية التأسيسية، ممكن جدا متبقاش بالانتخاب، ممكن جدا متبقاش بتمثل كل طوائف الشعب وفتاته، وممكن جدا متبقاش بتمثل التيارات السياسية المختلفة.

ما هو إحنا لو قلنا "لا" الدستور القديم هيرجع؟

مستحيل الدستور القديم يرجع، الدستور خلاص سقط مع الثورة، ولا يمكن حد يوافق برجوعه، المجلس العسكري فاهم إن الناس مش هتقبل الدستور ده. ده غير إن رجوع الدستور معناه إبطال كل قرارات المجلس العسكري لأنه هيبقي ساعتها غير دستوري، والمجلس مستحيل يحط نفسه في الموقف ده.

طيب ما هو معني كلامك إن لو قلنا "لا" مش هسقي فيه دستور بحكمتنا وهحصل فراغ دستوري؟

مش صحيح لأنه ينفع عمل إعلان دستوري مؤقت، دستور إنتقالي مكون من عدد محدود من المواد بضمن الحريات العامة خلال الفترة الانتقالية اللي هيتم خلالها انتخاب جمعية تأسيسية لوضع دستور جديد، وفيه مشاريع كثيرة لإعلانات دستورية، والخطوة دي حصلت في بلاد كتير مرت بنفس ظروفنا، وحصلت في مصر كمان بعد ٢٣ يوليو ١٩٥٢.

طيب هو إحنا لو قلنا "لا" مش ده هبخلي الجيش يحكم لفترة أطول وندخل في حكم عسكري؟

لا زي ما الإعلان الدستوري هينظم طريقة انتخاب الجمعية التأسيسية ممكن كمان ينظم انتخابات رئاسية، ننتخب من خلالها رئيس مؤقت بصلاحيات محدودة ويشكل حكومة مؤقتة لتسيير الأعمال خلال الفترة الانتقالية، وكل الفقهاء الدستوريين قالوا إن ده ممكن وطبيعي جدا.

طيب إيه اللي هحصل لو وافقنا على التعديلات ويرجع دستور ١٩٧١ للعمل مؤقتا لغاية لما بتغير؟

ما الأفضل خلال الفترة الانتقالية نتحكم بالإعلان الدستوري اللي ببيضن الحريات العامة بدل الدستور القديم اللي بيحرمننا من كل حقوقنا، ونعمل دستور جديد ومنتخب رئيس وبرلمان على نضافة.

بس إحنا لو انتخبنا جمعية تأسيسية هناخد وقت طويل علي ما نعمل دستور جديد "سحي سنتين كده"؟

لا مش صحيح، إحنا مش هنتخترع، إحنا أصلا عندنا دساتير قديمة أفضل مليون مرة من الدستور الحالي، وعندنا فقهاء دستوريين يقدرنا يصيغوا دستور خلال أسابيع أو شهور قليلة.

بصراحة إحنا نسمع إن اللي رافضين التعديلات ناس عابرة تلغي المادة الثانية من الدستور، وأنا مش

موافق على كده.

الدستور في النهاية هيتم عرضه على الشعب في إستفتاء، ولو الناس مش عايزه تلغي المادة الثانية مش هتوافق على إلغائها، يعني من الآخر الموضوع في إيد الناس مش في إيد حد ثاني.

ليه لأ على التعديلات الدستورية؟

مادة ٧٥	رئيس الجمهورية لازم يكون مصري من أبوين مصريين، ومتمتعاً بحقوقه المدنية والسياسية، وأن لا يكون قد حمل هو أو أي من والديه جنسية دولة أخرى، وألا يكون متزوجاً من غير مصرية، وألا تقل سنه عن ٤٠ سنة	يعني من الآخر كده النص ده مقصود بيه ناس بعينها ما تدخلش في سباق الرئاسة (طبعاً إحنا عارفين هما مين) يعني من الآخر رجعنا للتفصيل ثاني، وبعدين ليه ما قالش ومايزيدش عن ... سنة
مادة ٧٦	ويلزم لقبول لازم المرشح يأخذ موافقة ٣٠ من أعضاء مجلسي الشعب والشورى، أو توقيعات من ٣٠٠٠٠ مواطن من ١٥ محافظة وما يقلش عدد اللي موقعين عن الف في كل محافظة	الله أعلم بقى شكل المجلس اللي جاي هايكون عامل ازاي من غير أي ضوابط كده هانرجع للـ ٥٠% عمال وفلاحين، الكوتا وقانون الوطني وحسبته، ٣٠٠٠٠ ده كثير قوي وصعب وكمان ١٥ محافظة ياريت كانوا يقولوا اسمه بالمرة
مادة ٧٦ برده	اللي هايفصل في نتيجة الانتخابات الرئاسية لجنة إسمها اللجنة العليا للانتخابات الرئاسية قرارها نهائي ولا يجوز الطعن فيها بأي وسيلة	ليه هي اللجنة دي مقدسة طب إفرض أنا شاكك في نتيجة واحد كسب بالتزوير أو البلطجة أو الرشوة أعمل ايه؟ أروح أخبط دماغي في الحيط؟ وبعدين المادة دي مخالفة للدستور اللي بيقول إن قرار أي لجنة قابل للطعن... أصدق مين بقى؟
مادة ٨٨	يعرض مشروع القانون المنظم للانتخابات الرئاسية على المحكمة الدستورية العليا لإقرار مدى مطابقته للدستور	أي دستور اللي المحكمة هاتطبق عليه؟ الموقوف؟ البايظ رمز النظام السابق؟ طب أوامال ثورة إيه اللي عملناها؟ وبعدين مين اللي هايكتب القانون ده؟ الجيش ولا مجلس الشعب المنحل ولا مين؟
مادة ٧٧	مدة الرئاسة ٤ سنين بس ويتجدد له مرة واحدة بس	والله جميل بس إيه ده؟ ده المادة ١٩٠ بتقول مدة الرئاسة ٦ سنوات واللجنة مالغتهاش بيقى نصدق مين؟
مادة ١٨٤	الرئيس يعلن حالة الطوارئ لو لقي حاجة تستدعي، ويعرض على مجلس الشعب وممكن يوافق أو يرفض وما تزيدش عن ٦ شهور	يا نهار إسود ٦ شهور بحالهم فيه حالة طوارئ معرفش اتحرك ونرجع ثاني ممنوع أكثر من خمسة يمشوا في الشارع وأي حد كده يقول لي بطاقتك ويفتشنني لالالالالالالالالالال
مادة ١٧٩	إلغاء مادة الإرهاب اللي بتخلي الحكومة تتصنت على التليفونات وتفتش البيوت وتعتقل بحجة منع الإرهاب	هيبيبيبيه هو يعني ايه إرهاب اصلا مش عرفنا مين اللي كان بيعملوا وليه؟ بس خلى بالك قانون الإرهاب شخصياً لسه شغال
مادة ١٨٩	لرئيس الجمهورية (يعني يحق له) وبعد موافقة مجلس الوزراء، ولنصف أعضاء مجلسي الشعب والشورى طلب إصدار دستور جديد، وتتولي جمعية تأسيسية من مائة عضو، ينتخبهم أغلبية أعضاء المجلسين من غير المعينين، ويعرض رئيس الجمهورية المشروع خلال خمس عشرة يوماً من إعداده، على الشعب لاستفتاءه في شأنه	"الرئيس الجمهورية" يعني ايه طب افرض الرئيس مش عايز دستور جديد نبقى اتسوحنا رسمي ورجعنا لدستور ٧١ ثاني اللي بيدي للرئيس صلاحيات تخليه دكتاتور، كمان بموافقة الأغلبية من أعضاء مجلس الشعب طب افرض الأغلبية دي طلعت الحزب الوطني يختاروا هما اللي يكتب الدستور الجديد ورجعنا كده لنقطة صفر يعني للي قبل الثورة، ثم ان مفيش أي اشارة عن اللجنة التأسيسية دي وأعضائها مين ولا فيه أي حاجة تضمن لي نزاقتهم، ١٥ يوم؟! ده إحنا ٨ مواد محتاسين فيهم طب ازاي هانلحق في ١٥ يوم نقرا الدستور الجديد ده ونحكم عليه؟
مادة ١٨٩	يعين رئيس الجمهورية ٣/١ أعضاء مجلس الشورى	يا سلام تعيين أعضاء ثاني لأ يا انتخاب بالكامل يا بلاش

كل ده وبتقولوا لي افول نعم يعني هي بياتي في التحرير في عز البرد والضرب والناس اللي ماتت دي كلها يتضحك عليا بالتعديلات دي عشان اشتري الترمي..... يا أخي لأ وألف لأ